



Lupo Manarie nol crôt che il cjan marangul al existi.

Ma propite no i crôt. Né lui, né so barbe. Ma prime bisugne spiegâ.

No ducj a san che Lupo Manarie, di bande di mari, fradi de madone di so cusin Pauli, chel di San Pauli, che al veve sposât la gnece dal cunsuvrin de brût di sô agne Catarine, chê di Sante Catarine, che dopo che si jere lassade cun Pieri, di San Pieri e e jere lade a stâ là di Marc a san Marc, ancje se prime i veve domandât a la sô amie Marie di Sante Marie, che però e veve barufât cun Quarin, chel di San Quarin, e i veve lassât dite alc a Foscje, di Sante Foscje, che però no si veve mai savût; insome, pôçs a san che Lupo Manarie al veve un barbe che si clamave Zuan e che al jere a stâ a... Flambri!

Ben po, barbe Zuan al jere innomenât so redut pe sô barbe, che jere lungje, ma cussì lungje, che par cjaminâ al scugnive tirâsale sù e peâl tes orelis cun doi picjots, mieze di ca e mieze di là, in maniere che i saltavin fûr doi cuars di pêl alts fin tal sofit. Sî che duncje, une dì, anzit une gnot, Lupo Manarie al jere lât a cjatâlu par fâsi taiâ i pêi dal nâs, stant che barbe Zuan al faseve il barbîr, ma al lavorave dome di gnot. E ce nol sucedie? La lungje barbe di barbe Zuan a si ingrope tes orelis pelosis di Lupo Manarie e i doi a restin intacâts e a tachin a rodolâsi ciulant un e ciulant chel altri, fin che a fuarce di rodolâsi, a van a finîle sù par un arbul dongje de glesie, e a restin li parsore a ciulâ. Par fortune al rive un temporâl e cu la ploie a si distachin e a colin jù. Cuanche a van te osterie par tirâsi sù cuntune aghe e mente, i cjochetons de osterie i contin la storie dal cjan marangul: un mostri che al varès fat la tane propit dongje de glesie.

«Dutis fufignis!» al dîs Lupo Manarie, «Nô doi o jerin propite li e no vin viodût un biel nuie!»

di Rafaël Serafin

Dissen dai Piçui aiutants di Contecurte, Jacum e Ricart

#1009